

Iluarsiissut

Akissuteqaat 21-10-2023-meersoq taarserneqarpoq.
(Akissuteqaammi naqqiissuteqartoqarpoq, immikkoortumik peersisoqarpoq).

Meeqqanut inuusuttuaqqanullu ulloq unnuarlu angerlarsimaffimmik pilersitsiniarnermi, angerlarsimaffiit qanoq ittut, qanorlu perorsaariaasillit Nunatsinnut tulluartaunersut suullu piumasaqaatigissanerivut pillugit apeqquteqaat aallaavigalugu oqallinnissamik siunnersuut

(Inatsisartunut ilaasorta, Eqaluk Høegh, Inuit Ataqtigiit)

Akissuteqaat

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Inatsisartunut ilaasorta Eqaluk Høegh, Inuit Ataqtigiit, qujanaq sammisaq pingaarutilik manna oqallisigiumagakku.

Naalakkersuisut meeqqanut inuusuttunullu ulloq unnuarlu paaqqinnittarfiit pillugit aalajangiisarnerit tamarmik meeqqat pitsaanerpaamik atugaqarnissaanik aallaaveqarnissaat pingaartitarivaat.

Naalakkersuisut meeqqanut inuusuttunullu ulloq unnuarlu paaqqinnittarfinni sulisut ilinniarsimasut amerlanerusut pisariaqartinneqarnerat isumaqatigaat. Ulloq unnuarlu paaqqinnittarfiit amerlanerit ilinniarsimasunik ilinniarsimanngitsunillu sulisussaaleqereermata, Naalakkersuisut ulloq unnuarlu paaqqinnittarfinni sulisut ilinniagaqassusaannut atatillugu qaffasissusaannik kikkullu atorfinitsinneqassanersut maannakkut piumasaqaasersueqqittoqarnissaa pisariaqarsorinngilaat. Meeqqat ajunnginnissaat, toqqissisimanartumik isumassorneqarnissaat katsorsarneqarsinnaanissaallu Naalakkersuisut pingaarnerpaatippaat.

Ulloq unnuarlu paaqqinnittarfinni ataasiakkaani katsorsaanernik tarnillu pissusaanik ilisimasalinnit katsorsarneqarnermik periarfissaqarnissaa Naalakkersuisut isumaqatigaat. Ulloq unnuarlu paaqqinnittarfinni meeqqanut inissinneqarsimasunut isumaginninnikkut perorsaanikkut katsorsaariaaseq pingaarnertut neqeroorutigineqartarpoq. Tamassuma meeqqap nammineq inuttut inooqataanikkullu ineriartorneranut aamma ulloq unnuarlu paaqqinnittarfiup avataani namminerisaminik inuuneqarnissaminut piginnaasanik nutaanik ilikkarniarneranut ikorfartuivigaa. Meeqqanut inuusuttunullu paaqqinnittarfinni imminnut pigisuni Namminersorlutillu Oqartussanit pigineqartuni tamani katsorsaanissamik neqerooruteqarnissaq aammattaaq periarfissaavoq.

Naalakkersuisut meeqqanut inuusuttunullu ulloq unnuarlu paaqqinnittarfinni sulisut pikkorissaanermik neqeroorfigineqartarnissaannut isumaqataapput, sulisut suliannut piginnaanngorsaqqinnissaminut periarfissaqartuaannassammata. Sulisut pikkorissartarnissaannut piumasaqaammi apeqqutaavoq ulloq unnuarlu paaqqinnittarfiit pikkorissarnissamut piffissaqartinnissaat sulisoqarnissaallu qulakkeerneqarsimanersut

pissutigalugu Ulloq nnuarlu paaqqinnittarfiit aamma Ulloq unnuarlu neqeroorutit 2022-mut ukiumoortumik nalunaarutaanni sulisussaaleqineq naqissuserneqarsimavoq.

Ulloq unnuarlu paaqqinnittarfiit tamarmik naammassisassaannik piumasqaateqareermat Naalackersuisut erseqqissaatigissavaat. Isumaginninnermut Aqutsisoqarfiup saqqummersitaani ”Ulloq unnuarlu paaqqinniffinnik akuersisarneq pillugu qinnuteqartussamut ilisarititsineq”-mi pitsaassutsimut sammisat arfineq-pingasut pillugit piumasqaatit atuarneqarsinnaapput. Taakku akornanniipput ulloq unnuarlu paaqqinnittarfinni sulisut piginnaasassaannut aamma ulloq unnuarlu paaqqinnittarfiit periaasaannut angusassaannullu piumasqaatit, matumani perorsaanermut tarnit pissusaatigut ilaqtanillu katsorsaariaatsinut tunngasut ilanngullugit.

Naalackersuisut kommunit suleqatigalugit isumaginninnermut suliassaqarfiup aaqqissuunnissaanut pilersaarusiorniarput, tassani aaqqiissutinik piujuartunik pilersitsinissaq aamma kommunini meeqqat pillugit suliat suliarineqartarnerisa patajaallisarnissaat qitiutinneqassapput.

Taamatut oqaaseqarlunga sammisat pingaarutilik pillugu inersuarmi oqallittoqarluarnissaanut Naalackersuisut qilanaarput.